

مسرحة جحا و اللصوص الأربعة

تأليف
أحمد سلامة

مسرحية جحا و اللصوص الأربعة

مقدمة

صوت : كان يا ما كان ، يا سعد يا إكرام ، و ما يحلي الكلام إلا بذكر النبي عليه الصلاة و السلام . كان هناك رجل طيب القلب ، اسمه جحا ، فيه صفات الأمانة و الصدق و كراهية الخيانة ... و كل الناس كانت تحبه و يثقوا فيه .. و كانوا يتركون أشياءهم الثمينة أمانات عنده .. و كان جحا يشعر بالسعادة رغم انه لا يملك المال و لا البنين ... إلا أنه يملك القناعة في نفسه ، و التقدير و الاحترام من الآخرين علي أخلاقه النبيلة ، و كان يسير في الناس كأغني إنسان في الكون .

الفصل الأول

المشهد الأول

(جحا عائد من السوق راكبا حماره حاملا مشترياته يغني في فرح و سرور ... ويقول) :-

انا اغني إنسان في الدنيا

انا اغني إنسان في الكون

انا شمعة بتتور غيرها

و تنور أرجاء الكون

انا طير بيطير بجناحه

و يحلق و يطير لفوق

ينشر لكل الناس خير و سلام

انا مش غني بمال و لا عيال

انا غني بقلبي و وجداني

غني بضميري و كياني

انا إنسان ما عرفش أخون

انا اغني إنسان في الدنيا

انا اغني إنسان في الكون

(علي مقربة من جحا اربعة من اللصوص يظهرون و يتحدثون عن حالهم) .

شديد : حنفضل كده بلا شغل يا رجالة ، إحنا ما سرقناش حاجة من أسابيع .

جلجل : لو فضل الوضع على كده ح نموت من الجوع ... إيه اللي حصل للناس .. فلوسهم راحت فين ؟ .

بهلول : انا زهقت من سرقة الفراخ و البط ... انا محتاج فلوس .

أبو حديد (زعيم العصابة) : لايد من السطو على بيت واحد من الأغنياء .

جلجل : ولكن دي مخاطرة يا ريس .. يمكن تودينا السجن !

أبو حديد : هو ده الحل الوحيد ... الناس في أزمة و النشل مش نافعنا .

شديد : ولكن بيوت الأغنياء عليها حراسة من الشرطة .

أبو حديد : لازم نخاطر ، و إلا العيشة حتبقي صعبة علينا .

جلجل : هوه في خطة في دماغك يا ريس ؟ .

أبو حديد : ايوه ... عشان كده انا جيت بكم هنا !

شديد : وضح اكتر يا ريس ، الله يخليك ! .

أبو حديد : سمعتم عن جحا ؟ .

الثلاثة في صوت واحد : مين جحا ده ؟

أبو حديد : وصلتني أخبار انه بيحفظ بعض أموال التجار في بيته .

بهلول : قصدك يا ريس أن جحا هو سبب أزمة الدولار و اليورو و ارتفاع الأسعار .. ؟!

أبو حديد : مش للدرجة دي ، و لكن هو جزء من أزمتنا إحنا عموما ، انا حطيت خطة محكمة

لا فيها قتل و لا دم و لا حتى استخدام سلاح .. و كل شيء حبيقي عال العال .

جلجل : وضح اكتر يا ريس ... انا مش فاهم .

شديد : يعني قصدك نسرق من غير عنف ، يعني ازاي بقي ؟

بهلول : قصدك بالمكر و الحيلة ؟

أبو حديد : عفارم عليك يا بهلول .. بالمكر و الحيلة ، من غير دوشة أو حتى قلق أو أي شيء فيه شك .

جلجل : دا الوقت بدأت افهم .

أبو حديد : و انت عمرك فهمت حاجة قبل كده ... !

جلجل : انا بافهم يا ريس لكن بمزاجي .

شديد : و إيه هي الخطة يا ريس ؟

أبو حديد : اصبر يا شديد ، كل الأمور حتوضح بعد شوية .

شديد : يعني انت بدأت الخطة يا ريس .

أبو حديد : تمام يا شديد كمان دقايق قليلة حيكون جحا قدامكم راجع من السوق ، انا راقبت
تحركاته من أسبوع فات و حددت المكان ده و الزمان ده لأبدأ الخطة .
جلجل : يا سلام عليكم يا أبو راس كبيرة .
أبو حديد : راس كبيرة انا راسي كبيرة .
جلجل : آسف يا ريس ، لا مؤاخذه ... اقصد مخ كبير .
أبو حديد : دلوقتي كل واحد يحضر نفسه عشان يكون من رجال الأمن .
شديد : لكن منظرنا يا ريس مش حيبان عليه !
أبو حديد : رجال أمن السوق لازم يكونوا متنكرين ، و في أيديهم عصيان و جنزير حديد .
بهلول : يبقى إحنا محتاجين عصيان و جنزير حديد .
أبو حديد : كل شيء موجود ... افتح يا جلجل الشنطة ، فيها عصيان و جنزير ... ادي كل
واحد عصاية ، و سيب لي الجنزير .
شديد : و بقية الخطة يا ريس حتبقي إيه ؟
أبو حديد : كل حاجة حتعرفها في وقتها و عند اللزوم .
جلجل : من حرامي بط و فراخ إلى رجل أمن ... يا سلام !
بهلول : اتسي بقي البط و الفراخ و الكتاكيت ... و إلا حنروح في خير كان .
جلجل : لكن انا جعان .
أبو حديد : اصبر ، بكره تاكل تفاح ، و تحلي بكنتالوب و أناناس .

المشهد الثاني

(جحا يقترب بحماره من أفراد العصابة يغني أغنية :
يا دي النعيم اللي انت فيه يا قلبي ، من بعد العذاب)
جلجل : يا حول الله ... الراجل بيغني عن النعيم اللي هو فيه .. يظهر عليه مليون فلوس ... بس
يا عيني مش عارف اللي مستنيه .
شديد : اسكت ... يا عسكري ..
جلجل : تمام يا فندم .
أبو حديد : ياللا يا رجاله ... شديد .. وقف الرجل ده و جيبه هنا .
شديد : تمام يا ريس .
أبو حديد : ريس إيه الله يخرّب بيتك .
شديد : قصدي ... تمام يا فندم .

(شديد يصل إلى جحا)

شديد : انزل يا راجل من علي الحمار ، و تعال كلم البيه .

جحا : بيه مين ؟ و مين انت ؟

شديد : باقول لك انزل فوراً ... إحنا بوليس .

جحا : انا مش فاهم حاجة ، يمكن قصدك شخص تاني .

شديد : لا ، انت المقصود مش أنت جحا ؟

جحا : ايوه ، انا جحا ، خير هو فيه إيه ؟

(جحا يصل إلى أبو حديد و بقية أفراد العصابة)

أبو حديد : اسمك إيه ؟

جحا : اسمي جحا ... و لكن من فضلك فيه إيه ؟

أبو حديد : ما تتكلمش إلا ما أسألك يا راجل انت .

جحا : يا فندم هو فيه إيه ؟ انا راجل شريف .

أبو حديد : عسكري بهلول .

بهلول : تمام يا فندم .

أبو حديد : ففتشه .

جحا : يفتشنني . أوعى كده . بفتش مين . هو فيه إيه ؟

بهلول : اسمع الكلام احسن لك و إلا حنقبض عليك فوراً .

جحا : أمري إلى الله . و لكن انا مش فاهم حاجة .

(بهلول يفتش جحا)

بهلول : تمام يا فندم ، لقيت معاه وزه و شنطة خضار فيها بصل و خيار و بتنجان و كوسة .

أبو حديد : منين جبت الحاجات دي ؟

جحا : من السوق طبعاً .

أبو حديد : جانا بلاغ بالحاجات دي أنها مسروقة من السوق .

جحا : مسروقة ؟ ازاي ؟ انا اشتريتها بفلوسي . حتى اسألوا التجار في السوق .

أبو حديد : حتكدبنا ... إحنا رجال الأمن ... لازم نتأكد من صحة البلاغ .

جحا : لازم فيه حاجة مش مفهومة .. أو فيه تشابه أو خلافه انا شخص أمين و محترم ، و

كافي خيرى شري ، حاسرق وزه و كوسة و بتنجان علي آخر الزمن ... لا حول و لا قوة إلا

بالله.... انا باحفظ فلوس الناس ... ازاي يا عالم ؟ ازاي ؟

أبو حديد : عسكري شديد .

شديد : تمام يا فندم .

أبو حديد : إيه بيان المسروقات ؟

شديد (ينظر في الشنطة) : أربع كوسات و خمس بتجانات و أربع خيارات و بطاطساية و
حزمة جرجير و باكو رابسو و وزه ...

جحا : حرام عليكم . أكيد فيه حاجة غلط ... انا عمري ما اتحطيت في الموقف ده أبدا ...
اسألوا الناس عن جحا ... انا راجل أمين كل الناس بتثق في ، و بيحطوا فلوسهم عندي
أمانات... حاسرق علي آخر الزمن وزه ... حرام عليكم ... انا برئ من الاتهام الباطل ده .

أبو حديد : و إيه الحل ؟ التهمة لابساك لابساك .

جحا : حسبي الله و نعم الوكيل ... انا اصطبحت بوش مين النهارده ... مفيش غير عم
إمام... قال لي : روح ربنا يوقف في سكتك ولاد الحلال .. و انا قلت له من بقتك لباب السما ...
اهو الدعوة استجابت ...

جحا : يا فندم طب اديني فرصة ابرأ نفسي .

أبو حديد : برأ نفسك ... قدامك فرصة واحدة و أوعى تخذعنا .

جحا : روحوا السوق و اسألوا التجار عني .

أبو حديد : ما ينفعش الكلام ده .

جحا : طب إيه العمل ؟

أبو حديد : دليل البراءة لازم يكون من بيتك و من ممتلكاتك .

جحا : مش فاهم ، وضح اكتر .

أبو حديد : حنبعث أتتين من العسكر لبيتك لياتوا بدليل البراءة .

جحا : و إيه هو دليل البراءة ؟

أبو حديد : مجوهرات مثلا ، صندوق فلوس ، أحجار كريمة يعني شيء يدل علي انك لا
يمكن تسرق الحاجات التافهة دي .

جحا : يا حول الله ... انا مش مصدق اللي بيحصل ... عموما أمري لصاحب الأمر و السلطان
.. ابعث معي أتتين من الرجالة علشان يشوفوا الأشياء الثمينة اللي عندي .

أبو حديد : آسف يا جحا ، مقدرش أطلق سراحك ، ممكن تهرب ، و دي مسنولية ، ممكن
تهرب و تعمل لي مشكلة .

جحا : طب ، إيه اللي مطلوب مني لنفذه .

أبو حديد : ابعت خطاب لزوجتك اكتب فيه انه ضروري إرسال شيء قيم و غالي جدا
كدليل علي انك إنسان غني ، و مش محتاج تسرق أي حاجة من الحاجات دي . ممكن
مجوهرات زوجتك بالكامل .

جحا : أمري الله ، و الله أن مظلوم .

أبو حديد : عسكري جلجل .

جلجل : تمام يا فندم .

أبو حديد : هات ورقة و قلم و دواية للمتهم جحا .

جحا : متهم ؟ انا متهم ؟ هي دي المكافأة علي الأمانة ، علي العموم الحمد لله .

أبو حديد : بعد ما تكتب الجواب حتنظّر معانا و نبعت اثنتين من العسكر بالجواب لبيتك
ليحضروا دليل براءتك .

عسكري شديد ، عسكري بهلول .

شديد و بهلول (معا) : تمام يا فندم .

أبو حديد : خدوا الجواب و روحوا بيت جحا ، و احضروا دليل البراءة ، و إحنا هنا في
الانتظار .

بهلول : تمام يا ريس ... قصدي تمام يا فندم .

أبو حديد : انصرف ..

يسدل الستار

الفصل الثاني

المشهد الأول

(في منزل جحا .. منزل بسيط متواضع ، لا يدل علي وجود أي مظهر من مظاهر الترف .
يتكون من ثلاث حجرات .. في حجرة الاستقبال منضدة و اربعة كراسي و حصيرة مفروشة
علي الأرض و كنبه صغيرة)

(يسمع طرق علي باب الدار)

مرجانه : مين اللي بيخبط علي الباب ؟

شديد : إحنا رجال الأمن .. افتحي يا ست .

(مرجانه تفتح الباب)

مرجانه : خير أن شاء الله ... في حاجة حصلت لجحا .

شديد : لا تنزعجي ، الأمر بسيط .

مرجانه : قلقتني ، قول لي : جحا بخير ، و لا حصلت له حاجة .

بهلول : اهدي يا ست .

مرجانه : أكيد حصل حاجة . قول لي إيه اللي حصل ، الله يكرمكم .

شديد : عموما اهدي ، جحا جوزك بخير و في الحفظ و الصون .

مرجانه : بس هو فين ، طمني عليه .

شديد : هو مقبوض عليه ؟

مرجانه : انا مش مصدقة ! هو عمل إي ه ؟

بهلول : إحنا مشتبهين في انه سرق حاجات من السوق .

مرجانه : انت بتقول إيه ؟ اخرس ... جحا اشرف من الشرف ... دا عمره ما عرف الحرام ، و

عمره ما دخل بيته لقمة حرام .

بهلول : امسكي لسانك يا ست ... انت بتكلمي رجل أمن .

مرجانه : انا حاتجن ... ازاي تقولوا علي جحا الكلام ده .. أسألوا الناس عن جحا ، و شوفوا

مين حيصدق كلامكم .

شديد : إحنا مش عايزين نضيع وقت كتير .

مرجانه : و إيه التهمة أن شاء الله .

بهلول : اشتباه في سرقة وزه و بعض الخضار و الفاكهة من السوق .
مرجانه : سرقة وزه و خضار من السوق ! تعالوا يا ناس اسمعوا جحا سرق وزه و
خضار من السوق !
بهلول : كفاية يا ست .
مرجانه : تعالوا يا تجار الصاغة ، ياللي بتحطوا مجوهراتكم أمانة عند جحا ، جحا سرق وزه
... تعالوا يا تجار القماش ، ياللي بتحطوا فلوس البضاعة عند جحا جحا سرق حبة خضار .
شديد : يا ست ، ده مجرد اشتباه .
بهلول : و ممكن يطلب البراءة و يرجع لك بالسلامة .
شديد : لو بتحبي جحا يبقي لازم تساعداه .
مرجانه : باحب جحا ؟ ده جحا ده أيامي اللي فاتت ، و أيامي اللي جاية ... ده أملى و نور
عيني ... ده جوزي .
بهلول : عظيم ... باين عليك انك زوجة وفية .
شديد : خلىنا في المفيد ... و بلاش نضيع وقتنا في اللي ما فيهوش فايده .
مرجانه : بس حاساعده ازاي ؟
شديد : آدي جواب من جحا ، اقريه يا ست و نفذي اللي فيه .
(مرجانه تأخذ الجواب و تقراه بصوت مرتفع)
مرجانه (تقرا) : زوجتي العزيزة مرجانه .
هذا خطاب من زوجك الفقير إلى الله جحا . يسألك إرسال الصندوق الآبنوس
من تحت السرير ... اللي فيه الحاجات الخاصة بيا .
مرجانه ما تقلقش عليا ، كل شيء بأمر الله ، و ربنا ويا عبده الغلبان
..... زوجك جحا .
مرجانه : يا حبيبي يا جحا (تبكي) ده باين عليه الموضوع جد ، جحا مش ممكن يعمل كده ...
مش ممكن يعمل كده .
شديد : قلنا لك ما تخافيش و جحا حيرجع لك صاغ سليم .
مرجانه : خدوني معاكم اطمئن عليه .
بهلول : ممنوع يا ست ، ده محجوز و ممنوع عنه الزيارة .
مرجانه : طب اوصفولي المكان ، اروح ابص عليه .
شديد : ما ينفعش ... دي تعليمات لازم ننفذها .

مرجانه : يا مسكين ، يا جحا ، كان مستخبي لك فين كل ده ، ده عمره ما أذي حد ، و عايش لغيره اكتر ما هو عايش لنفسه .

شديد : ياللا بسرعة ، احضري الصندوق قبل ما يعدي النهار و يفوت .
مرجانه : جوزي و الله مظلوم ، جوزي و الله مظلوم .

(تذهب مرجانه لتحضر الصندوق)

بهلول : يا سلام ... الخطه ماشية عال العال .

شديد : اسكت ... و إلا حتسمعك ... و تودينا في داهية .

بهلول : ماشي الكلام يا حضرة الضابط شديد .

شديد : انتباه يا عسكري بهلول .

(تعود مرجانه بصندوق متوسط الحجم من الآبنوس)

مرجانه : ده الصندوق اللي جحا قال عليه في الجواب .

شديد : خد الصندوق منها يا عسكري .

بهلول : تمام يا فندم ... هاتي الصندوق .

(مرجانه تعطي الصندوق لبهلول)

(بهلول يحمل الصندوق إلى شديد)

شديد : ده الصندوق عليه قفل .

مرجانه : ايوه . عليه قفل ، علشان جحا بيحط فيه الحاجات القيمة و الغالية .

بهلول : يعني فيه فلوس مجوهرات؟

مرجانه : اللي يعرف صاحب الصندوق .

شديد : مش انت زوجته و شريكة حياته .

مرجانه : نعم ... و لكن دي حاجته الخاصة جدا اللي ورثها عن آباه و أجداده .

شديد : طب فين المفتاح ، يا زوجة جحا الطيبة .

مرجانه : انا ما عيش مفتاح الصندوق ، المفتاح مع جحا .

شديد : انت متأكدة ؟

مرجانه : انا ما عيش المفتاح ، المفتاح مع جحا .

بهلول : أوعى تكوني بتخدعينا ... يبقي انت اللي جنيتي علي نفسك ، و علي جوزك العزيز .

مرجانه : انا ما عرفش الكذب و الخداع ، و كمان جوزي زبي .

شديد : عموما مش مشكلة ، طالما جحا معاه المفتاح .

(شديد يوجه الكلام لبهلول)

شديد : عسكري بهلول ، لف الصندوق و حطه في الشنطة .

بهلول : تمام يا فندم .

شديد (لمرجانه) : عموما ، حناخذ الصندوق للجهات المسنولة ، و علشان ما يحصلش بلبلة

مش لازم حد يعرف اللي حصل ، علشان صورة جوزك ما تتهزش قدام الناس .

مرجانه : ربنا يلطف بيه و ينجيه ... بس انا عايزة اسأل سؤال .

شديد : اسألي .

مرجانه : ليه ممنوع الزيارة و جا مشتبه فيه بس ؟

شديد : دي تعليمات ، انا قولتلك الكلام ده .

بهلول : عموما .. جا مش حيتاخر كتير عنك .

مرجانه : وحشنى وحشنى .

بهلول : يا سلام علي الحب الحقيقي .

شديد : ما تقلقيش ... الحقيقة حتظهر و أن كان جا مظلوم حيعود .

(مرجانه تبكي ... و يخرج بهلول و شديد معهما الصندوق)

المشهد الثاني

وقع الشك في قلب مرجانه علي زوجها العزيز جا ، فأسرعت إلى قسم البوليس ظنا

منها أن زوجها هناك ...

مرجانه : فين جا يا شاويش ؟ فين جوزي يا بوليس ؟

الشاويش : اسكتي يا ست .

مرجانه : عايزة اشوف جوزي .. عايزة اشوفه يا ناس .

الشاويش : انت مين يا ست انت ؟

مرجانه : انا زوجة جا .

الشاويش : و عايزة إيه ؟

مرجانه : عايزة اشوف جوزي ... الله يخليك .

الشاويش : جوزك مين يا ست ؟

مرجان : جوزي جا .. اللي انتم قابضين عليه .. انا جايبة له اكل معايا ... اشوف جوزي بالله

عليك يا شاويش .

الشاويش : ما عندناش حد بالاسم ده .

مرجانه : عملتم إيه في جوزي ؟ عملتم إيه في جا ؟

الشاويش : انت يا ست اسكتي ! جحا إيه ؟ و جوزك إيه ؟ قلت لك ما عندناش حد بالاسم ده .
مرجانه : و العساكر و الجواب و الصندوق الآبنوس .
الشاويش : يظهر عليك مجنونة . عساكر إيه ؟ و صندوق إيه ؟ ياللا اتكلي علي الله . و إلا حابلغ عنك مستشفى المجانين .
مرجانه : انا فى عرضك عايزة اعرف مكان جوزي .
الشاويش : و الله العظيم ما أنى فاهم حاجة .
مرجانه : الله يخليك يا شاويش ، ساعدني ... يستر عرضك ، انا ست مكسورة الجناح .
الشاويش : طب اهدي كده و احكي لي الحكاية .
مرجانه : جالي رجلين من رجال الأمن ، و جابولي جواب من جوزي يطلب مني إرسال صندوق يثبت انه برئ من سرقة وزه و حبة خضار من السوق .
الشاويش : و إيه شكل الرجالة دول ؟ و عددهم كام ؟
مرجانه : رجلين ... طوال .. واحد بشنب و شعره قصير ، و الثاني من غير شنب و اصلع .
الشاويش : و خدوا منك الصندوق ؟
مرجانه : ايوه يا شاويش .
الشاويش : و إيه اللي في الصندوق ؟
مرجانه : حاجات خاصة بجوزي جحا .
الشاويش : يعني فيه فلوس ... مجوهرات ؟
مرجانه : فلوس قليلة كان شايلها للعوزة و حلق ذهب ورثه عن جدته .
الشاويش : يبقى دول بقى حرامية .
مرجانه : حرامية . يا خبر ابيض ... جوزي يا شاويش ... جوزي يا شاويش ... الحقوه يا شاويش .
الشاويش : اهدي شويه ... هو جوزك بيشتغل إيه ؟
مرجانه : تاجر علي قد الحال .. و يحتفظ ببضاعة بعض التجار عنده في الكرار .
الشاويش : بضاعة بس ؟
مرجانه : وأحياناً بيحطوه عنده علي سبيل أمانة فلوس و مجوهرات .
الشاويش : عظيم .
مرجانه : عظيم إزاي يا شاويش ؟
الشاويش : يبقى المقصود فلوس التجار مش فلوس جوزك .
مرجانه : قصدك إيه ...

الشاويش : ما تقلقيش ، أكيد حايرجعوا عشان يأخذوا اللي نفسهم فيه .
مرجانه : قصدك القلوس والبضاعة .
الشاويش : فهمتها لوحدهك .
مرجانه : يبقي جوزي في خطر مسكين يا جحا .
الشاويش : ماتخافيش .. طالما ما وصلوش للمال الحقيقي يبقي جوزك في أمان .. وحيرجعوا مرة ثانية .
مرجانه : إزاي ؟
الشاويش : إحنا حنحط خطة وإن شاء الله حنقبض عليهم .
مرجانه : أنا خايفة ياشاويش .
الشاويش : ما تخافيش .. إحنا معاك .. ونفذي اللي حانقول لك عليه بالحرف الواحد .
مرجانه : تحت أمرك ياشاويش .. المهم جوزي يبقي في أمان .
الشاويش : دلوقتي روحي علي بيتك ، وما تخافيش ، إحنا حنحط خطة مناسبة ، وكوني منتظرة التعليمات .

المشهد الثالث

(يصل بهلول وشديد بالصندوق إلي جحا .. وبقية أفراد العصابة)

جلجل : آدي الرجالة وصلت ! قصدي العساكر وصلت !
أبو حديد : حمد لله علي السلامة . جبتكم الأمانة !
شديد : تمام يافندم ، كل حاجة تمام وعلي ما يرام .
جحا : آدي الصندوق الأبنوس اللي فيه دليل البراءة إن شاء الله .
أبو حديد : ناولني الصندوق يا عسكري شديد!!
شديد : تفضل يا فندم !
أبو حديد : بس عليه قفل كبير .. فين المفتاح يا عسكري شديد ؟
شديد : المفتاح مع جحا زوجته قالت لنا كده .
أبو حديد : معاك مفتاح الصندوق يا جحا ؟
جحا : أيوه معايا (يخرج المفتاح من جيبه)
(يأخذ أبو حديد المفتاح ويفتح القفل ثم يفتح الصندوق)
أبو حديد : إيه ده ؟
جحا : دا كل ما أملك من الدنيا .
أبو حديد : أنت بتستهبل علينا ولا إيه ؟

جحا : قصدك إيه ؟ دي كل حاجة غالية عندي باحتفظ بيها .
أبو حديد : وإيه بقي غالي في الصندوق إن شاء الله ؟
جحا : صور جدي وجدتي وخطاب من أمي ، وحلق ذهب من جدتي ، وعشرين درهم شايلهم للزمن ، وصورتني وأنا في الحضانة .
أبو حديد : أربطوه بالجنزير أنت لص خطير .
جحا : أرجوك ، صدقني دا كل ما أملك .. ودا يكفيني ويفيض .
جلجل : بتسمي صورتك في الحضانة دليل براءة ؟
بهلوا : ولا العشرين درهم اللي مايجيبيوش بطة ولا وزه ، وبتسميهم فلوس ؟
أبو حديد : أنت بتخدعنا وتلعب علينا .. فاكِر نفسك ذكي .
جحا : أنا مش ذكي ، أنا جحا .
شديد : علي مين يا شاطر ؟
أبو حديد : فين فلوس التجار اللي في بيتك يا جحا ؟
جحا : وبتسأل ليه عن فلوس التجار ؟
أبو حديد : من غير سؤال .. الفلوس تكون هنا ولا حتكون في خبر كان .
جحا : هو إيه الموضوع بالضبط ؟ أنا بدأت أشك في الموضوع .
شديد : من غير كلام .. إحنا عايزين الفلوس اللي عندك في البيت .
جحا : وآيه علاقة الفلوس دي وموضوع البراءة ؟
أبو حديد : جحا ، يا أنت يا الفلوس ، يا خفيف .
جحا : إرحمني يا مغيث ... أنتم مش بوليس .
بهلول : إديك فهمتها لوحدهك يا حدق .
جحا : أنا كنت حاسس ومش مرتاح .. ومش مصدق .. كل حاجة ظهرت وبانت .
أبو حديد : خلينا نلعب علي المكشوف .. من غير رتوش .
جحا : نلعب علي المكشوف ؟ إزاي ؟
أبو حديد : عايز تفدي نفسك من الموت .. وتعيش في أمان وسلام .
جحا : أفدي نفسي من الموت .. وأعيش في أمان وسلام .. وضح لي إزاي ؟
أبو حديد : حلو الكلام .. تدينا الفلوس اللي عندك أمانات من غير شوشرة .
جحا : بس الفلوس دي مش بتاعتي .. (دي أمانة عندي) .
أبو حديد : حياتك .. ولا الأمانة .
جحا : حياتي من غير أمانة ماتبقاش حياة .. يبقى الموت أحسن

شديد : سبيك من الكلام الكبير الفارغ ده .. ما ينفعش دلوقتي
جحا : اللي ينفع واللي ما ينفعش .. علي جثتي الفلوس .. دي أمانة لا يمكن أفرط فيها .. دي
رأسمالي في الحياة .
أبو حديد : باين عليك مش ناوي تجيبها البر .
شديد : باين عليك دماغك ناشفة .
بهلول : أسمع الكلام وخليك حلو معانا .. وإلا ...
جلجل : يا خوانا .. الراجل حيسمع الكلام وينفذ المطلوب .. ده جحا راجل طيب .
أبو حديد : بأحذرك آخر تحذير .. لو ما نفذ المطلوب تبقي أنت اللي جبته لنفسك .
جحا : يا ناس حرام عليكم أنتم كده بتقتلونني .. أقول للناس إيه ؟
جلجل : سهلة .. قول الحق أتسرقوا من البيت وأنا في السوق .
بهلول : أو قول لهم أتبرعت بيهم للفقراء والمحتاجين .
جحا : أقول إيه وأعيد إيه .. إيه الكلام الفارغ ده .
أبو حديد : إحنا تعبنا معاك .. وباين كده مفيش فايده .
شديد : إيه العمل وياه باري .
أبو حديد : ناخذ مراته رهنية .
جحا : إلا مراتي يا لصوص .. إياكم حد يقرب لها .
شديد : هو ده الحل .
جحا : هو أنتم ماتعرفوش معني الأمانة .. معني الشرف ؟ أنتم ما تعرفوش معني الصدق
والوفاء ؟
بهلول : أنت حتعكنن علينا ليه ؟
جحا : مفيش أحسن من العيش بالحلال .. الحرام مايغنيش .. الحرام ما يغنيش .
أبو حديد : أنت راجل طيب يا جحا ولكن للضرورة أحكام .
جحا : أنا مستعد أساعدكم في حدود إمكانياتي وأحضر لكم أعمال شريفة تكسبوا منها اللقمة
الحلال .. جربوا الحلال .
أبو حديد : مفيش فايده يا جحا ، مفيش فايده ، نفذ اللي قلت لك عليه وإلا مراتك حتكون رهينة .
جحا : حسبي الله ونعم الوكيل .. أعمل إيه يارب ؟
شديد : تعمل اللي عملته المرة اللي فاتت .. تبعت جواب لمراتك ، تقول لها تبعت جميع الفلوس
لك عشان تسلمها للتجار .
جحا : يعني مفيش فايده ، والله الموت أرحم .. الموت أرحم .

جلجل : شد حيلك يا جحا .. أنت راجل قوي .

بهلول : كلنا لها .

جحا : آه يا لصوص يا وحوش .. أقول لكم إيه ؟ ربنا موجود .

أبو حديد : أكتب الجواب وخلصنا .

(يكتب جحا الجواب متحسراً)

جحا (وهو يكتب) : يارب سلم .

(أبو حديد يأخذ الجواب)

أبو حديد : أذهب يا شديد أنت وبهلول .. وخلي مراته تنفذ المطلوب .. ولو عارضتكم أنتم

عارفين حتعملوا إيه .

بهلول : تمام ياريس .

شديد : يلا يا بهلول .

أبو حديد : ماتتأخروش .

الفصل الثالث المشهد الاول

(بهلول وشديد يطرقان باب بيت جحا)

مرجانة : مين اللي علي الباب ؟

بهلول : إفتحي .. إحنا رجال الشرطة .

مرجانة : خير اللهم إجعله خير .. فين جوزي فين جحا ؟

شديد : جوزك في أمان وسلام .

مرجانة : طب ماجاش معاكم ليه ؟

شديد : مسألة وقت وإجراءات .. وبعدين نفرج عنه .

مرجانه : جحا وحشني قوي ياتري بياكل .. ياتري بيشرب ، ولا جعان وعطشان

بهلول : دا بياكل أحسن أكل وبيشرب أحسن شرب .

شديد : إحنا بنهتّم بأكل المتهمين .

مرجانه : وأمتي حتفرجوا عنه ؟

شديد : النهارده .. ولكن لما نخلص الإجراءات .

مرجانة : وإيه هي الإجراءات دي ؟

شديد : ماتلقيش .. فيه تجار لما عرفوا أن جحا متهم بالسرقه .. طالبت بالفلوس إلی عنده .

مرجانه : جحا ماعند هوش فلوس .

بهلول : مش فلوس جحا .. الفلوس اللي شايلها للتجار .

شديد : حنسلم للتجار فلوسهم .. وحنفرج عن جحا . خدي الجواب ده وفيه كل حاجة .

مرجانة : إيه اللي حصل في الدنيا ؟ ياخسارة .. والله جحا مظلوم .

بهلول : أدي حال الدنيا .. الناس أتغيروا بقوا يخافوا علي فلوسهم .

شديد : أظن الأمور دلوقتي واضحة ؟ سلمينا الامانات .

نردها لاصحابها .. علشان جحا نفرج عنه ويرجع لك .

مرجانة : والله أنا متحيرة .

بهلول : مفيش حيرة .. أدخلي وهات الفلوس .. وكل شئ حبيقي عال العال .

مرجانة : بس الفلوس .. جحا حافظها في أربع صناديق كبار . وكل صندوق عليه قفل كبير .

شديد : قصدك إيه ؟

مرجانه : يعني كل صندوق محتاج رجلين علشان يشيلوه .

بهلول : دي بقي مشكلتنا .. ماتلقيش .

شديد : روح يا عسكري بهلول .. وجهز لنا عربة لنقل الصناديق .
بهلول : تمام يافتدم .. أن كل صندوق عليه قفل .
مرجانة : أيوه كل صندوق عليه قفل كبير .
شديد : طب المفاتيح فين ؟
مرجانة : جحا هو اللي معاه المفاتيح .
شديد : خلي بالك .. أوعي تكوني بتكذبي .
مرجانه : إحنا ناس مانعرفش الكذب ولا الخداع .. إحنا عايشين علي الامانة والشرف .. دي كل حاجة ليها في الدنيا .
شديد : ونعم الناس .. ونعم الناس ..
(شديد وبهلول يحملان الصناديق)

المشهد الثاني
(يصل شديد و بهلول بالصناديق الكبيرة إلي جحا وبقية أفراد العصابة)
أبو حديد : عفارم يارجاله هو ده الكلام . نزلوا الصناديق .
جلجل : مايجبها إلا رجالها .

(جحا ينظر إلي الصناديق بتعجب)
جحا : إيه دا كله ؟ انتوا جببتموا كل اللي في البيت ؟
أبو حديد : انت أبو الكرم يا جحا .. إحنا خدنا الامانات وعليهم واجب الضيافة .
(يضحك الجميع إلا جحا)
جحا : آه منكم يا حرامية .. ياصوص .. منكم لله اللي بتعملوه ده حرام ... والله حرام .
بهلول : تعرف تسكت .. ياشيخ جحا .
جلجل : سيبوه ينفس عن نفسه شوية .
جحا : حتروحووا من ربنا فين ياظلمة ؟
أبو حديد : فين مفاتيح الصناديق يا شديد ؟
شديد : مع عمو جحا .
أبو حديد : فين مفاتيح الصناديق يا جحا .
جحا : أنا معيش مفاتيح .
شديد : بس زوجتك العزيزة قالت ان المفاتيح معاك .
جحا : زوجتي متعرفش حاجة عن حكاية المفاتيح دي .

أبو حديد : جحا .. اعقل كده وطلع المفاتيح أحسن لك .
جحا : قلت لكم معيش مفاتيح .
أبو حديد : جلجل بهلول ، فتشوه ..
جحا : أنا معيش مفاتيح .. ولومعايا حخبها ليه .
أبو حديد : أنت فاكّر نفسك حتضحك علينا .. فتشوه .
جحا : ماحدش يفتشني .. أنا ما قبلش إلا لجنة تفتيش من مجلس الامن وبموافقة الامم المتحدة كمان !
أبو حديد : خلصنا ياخفيف .
جحا : صدقوني مفيش مفاتيح .
جلجل : خلاص نكسر الأقفال من علي الصناديق وبعدين نبقي نفتش عن المفاتيح .
بهلول : يا جماعة لازم نديله فرصة .
جلجل : طب افرض فتشناه .. ولقينا المفاتيح مش معاه .
أبو حديد : نكسر الأقفال .. ونأخذ اللي في الصناديق .
جحا : ياسلام علي العدالة والذمة والامانة .
بهلول : آمال .. إحنا عصابة ديموقراطية .. بننادي بالحرية .. لازم كل إنسان يأخذ حقه .
جحا : أول مرة في حياتي أشوف حرامية بالشكل ده .. ياسلام .. بيحترموا حرية الفرد والامانة .
أبو حديد : سبنا من كل ده .. وخلينا في المفيد .. حتطلع المفاتيح ولا ...
جحا : يا جماعة أنا معيش مفاتيح .. وأول مرة أشوف الصناديق ودي عموما المفاتيح بتاعتي .
أبو حديد : خدوا المفاتيح وجربوها .
جحا : لاحول ولا قوة إلا بالله إيه اللي حصل في الدنيا .. ناس بتسرق بكل بساطة وسهولة .. وعاملين ده شرف ونزاهة وعدل وخير حسبنا الله ونعم الوكيل .
أبو حديد : إيه الاخبار ؟ المفاتيح مافتحتش الصناديق ؟
(ينظر إلي جحا) حسابك معانا عسير .
جحا : مابقتش تفرق .. كلها موته والسلام .
أبو حديد : أكسروا الاقفال يارجالة .
شديد : استنوا يا جماعة .
أبو حديد : خير ياشديد .
شديد : ولا حاجة ياريس .. قبل مانكسر الاقفال كل واحد يعرف حقه علشان ما نختلفش .

بهلول : صح كلام عين العقل .
جلجل : نقسمها بالحق والمستحق .
أبو حديد : كل واحد يأخذ صندوق .
شديد : وافرض صندوق فيه فلوس أكثر .. إيه العمل ياريس .. أنا وبهلول اللي رحنا وشننا
وخاطرنا .
جحا : حلو حيتلفوا .. يا رب أنت علي الظالم وإبن الحرام .
أبو حديد : وأنا اللي عملت الخطأ والترتيب .
جلجل : يعني أنا اللي وقعت من قعر القفة .
بهلول : طب إيه العمل ؟
أبو حديد : نكسر الاقفال وبعد كده نقسم ..
شديد : آسف ياريس أعرف حقي في الصناديق .. أنا وبهلول لنا ثلاثة صناديق ، وأنت وجلجل
صندوق .
أبو حديد : يبقى أنت ناوي علي الشر يا شديد .
جحا : حتولع دلوقتي .. ياللا.. شدوا حيلكم .
جلجل : يا جماعة ماتفرجوش علينا الناس .
شديد : إحنا كنا القوات اللي قامت بالعملية .
أبو حديد : وإحنا كنا المخ اللي خطط لها .
جلجل : وإيه الحل عشان مانختلفش .
أبو حديد : أنا عندي حل .
شديد : إيه هو ياريس ؟
جحا : نعرف من جحا اللي في الصناديق قبل مانفتحها وعلي الأساس ده نقسم .
بهلول : دي فكرة مش بطالة .
أبو حديد : جحا .. اتعاون معانا أحسن لك .. أبعد عن الشرور والدمار لك ولزوجتك .
جحا (يفكر) : يارب وفقني وإسترها معايا يارب .
أبو حديد : أنه مش سامع يا جحا .
جحا : سامع .. سامع .
أبو حديد : قلنا اللي في الصناديق يا جحا .
جحا : مش عارف .
أبو حديد : إزاي مش عارف .. مش دي أمانات عندك ؟

جحا : دي أول مره أشوف الصناديق دي .
أبو حديد : كلام مايطمنش .. أنت غاوي مشاكل وكلام فارغ .
جحا : وأنتم غاوين شر ومكر .. قلوبكم سودا وعقولكم عقول شياطين . حتعملوا إيه باللي جوده الصناديق .
بهلول : مالكش دعوة .. حتشاركنا في مالنا .
جحا : مالكم .. بقي بتاعكم خلاص . والله عال .
أبو حديد : خلي بالك .. حنديك مهلة صغيرة تفكر . وبعدين حتصرف .
جلجل (يقترب من جحا) : جحا .. يازينة الرجال ..
جحا : عاوز إيه مني ياسي إيه ؟ روح لعب بعيد .
جلجل : أنت نسيت نفسك ..
جحا : لامانسيتش نفسي .. أنا شريف وأنت حرامي .
أبو حديد : المهلة خلصت يا جحا .. يللا علشان ترجع لمراتك .
جحا : أمري إلی الله ... انا عارف أن الصناديق فيها بضاعة .
أبو حديد : حلو .. وإيه البضاعة دي ؟
جحا : قماش .. أدوات منزلية .. حبوب .. كتب .. مجلات .
بهلول : حلو قوي .. كتب ومجلات ؟
أبو حديد : استني يا بهلول .. فسر كلامك يا جحا .
جحا : زي ماقلت . مثلاً عم جودة البقال بيخزن عندي في الكرار تمر لشهر رمضان ، وعم إمام الساعاتي بيثيل عندي الساعات القديمة وعم الشيخ نعمان بيحط عندي كتب .
أبو حديد : يعني الصناديق مافيهاش فلوس ولا مجوهرات ولا ذهب .
جحا : بالضبط كده .
أبو حديد : فيه صندوق فلوس فيهم ؟
جحا : ممكن يكون الاول .. الثاني .. الثالث .. الرابع .. الله أعلم .
شديد : يعني فيه صندوق واحد فيه فلوس .. والباقي بضاعة وكتب .
أبو حديد : لو كنت بتكذب يا جحا .. حيكون حسابك عسير .
جحا : أسمع ياسيد أبو حديد العمر واحد والرب واحد .
أبو حديد : نعمل قرعة علي الصناديق وكل واحد وحظه .
بهلول : يعني فيه واحد حياخذ الفلوس والباقي ياخذ بضاعة وكتب .
جلجل : يا حلاوة .. أخذ حقي كتب بعد كل الغلب كده .

جحا : وماله علشان تتنور وتتثقف .
شديد : ماينفعش ياريس .. يبقي واحد بس كسبان والباقي خسران .
بهلول : عندي فكرة .. نفتح كل الصناديق .. ونقسم كل اللي فيها علينا قسمة العدل .
جحا : عدل ؟ وأنتوا تعرفوا العدل ؟ انتم ظلمة .
شديد : بتقول إيه يا جحا ؟
جحا : ولا حاجة .. عندي فكرة .. وريحوا أنفسكم .
أبو حديد : حتقول لنا فكرة .. قول يافالح .
جحا : تسيبوا الصناديق ، وتفضلوا أصحاب ، وتسيبوني أرجع بيتي .
أبو حديد : ده أنت دمك ثقيل .
جحا : الله يسامحك .
شديد : إن رأيكم نفتح الصناديق وبعدين نتحاسب .
أبو حديد : أنا بقول كده برضه .. وبعدين يحلها الحلال كل واحد فينا يقف أمام صندوق ويكسر القفل .
بهلول : أنا إخترت الصندوق الأول . (يقف أمامه)
شديد : وأنا الصندوق الثاني . (يقف أمامه)
جلجل : وأنا الصندوق الثالث . (يقف أمامه)
أبو حديد : وأنا الصندوق الرابع (يقف أمامه)
هيا يارجاله .. حطموا الأقفال .
(العصابة تحطم الأقفال جحا ينتظر)
(تكسر الأقفال ويخرج أربعة من رجال الشرطة من الصناديق)
(ويطلقون الرصاص - و يمتلئ المسرح برجال الشرطة)
جحا : إيه اللي حصل ؟ ما أعدك يارب .. يا من لا تغفل ولا تنام .
(العساكر بيحيطون برجال العصابة)
جلجل : أدينا روحنا في حديد ياسيد أبو حديد .
بهلول : ولا خدنا ذهب ولاحتي صفيح .
جحا : ده جزاكم بالصوص . أنتم نسيتم ربنا .
الشاويش : ربنا أنقذك يا جحا .. والبركة في زوجتك .
جحا : مرجانة ؟

الشاويش : زوجتك زوجة صالحة ..من خوفها عليك عرضت نفسها للخطر .. وإشتركت في
الخطئة علشان تنقذك .

جحا : وهي فين دلوقتي .. الله يحفظها .

الشاويش : هي بخير .. منتظراك في البيت .

جحا : الحمد لله رب العالمين .. أشكرك يارب أشكرك يارب .

الشاويش : أما أنتم يالصوص . حتكونوا عبرة لغيركم من مرضي النفوس الخبيثة .. حاتخدوا
جزائكم .. علشان تعرفوا معني كلمة الأمانة .. وتنسوا السرقة والخيانة .

المشهد الثالث

(جحا يركب حماره ويغني في سعادته عانداً إلي بيته)

أنا لأملك مالا ولا حاجة

أنا أملك حب الناس

أنا ملك جوه الكون

برضاي .. بقناعتي .. يبقي كل الكون ملكي .

أنا أسعد إنسان في الدنيا .

أنا أغني إنسان في الكون

أنا أغني إنسان الكون

يسدل الستار